

欽定盛京通志

欽定盛京通志卷之一百十二

歷朝藝文四

書

簡牘

序

欽定盛京通志卷之一百十二

歷朝藝文四

(書)

貽邴原書

後漢孔融

隨會在秦賈季在翟諮仰靡所歎息增懷頃知
來至近在三山詩不云乎來歸自鎬我行永久
今遣五官掾奉問榜人舟楫之勞禍福動靜告
慰亂階未已阻兵之雄若棋奕爭梟

與陶侃書

晉慕容廆

明公使君轂下振德耀威撫寧方夏勞心文武
士馬無恙欽高仰止注情彌久王塗險遠隔以
燕越每瞻江湄延首遐外天降艱難禍害屢臻
舊都不守奄爲邊庭使皇輿遷幸假勢吳楚大
晉啟基祚流萬世天命未改元象著明是以義
烈之士深懷憤踊猥以功薄受國殊寵上不能
掃除羣逆下不能身赴國難仍縱賊臣屢逼京
輦王敦倡禍於前蘇峻肆毒於後凶暴過於董
卓惡逆甚於催汜普天率土誰不同忿深怪文

武之士過荷朝榮不能滅中原之寇刷天下之
恥君侯植根江陽發曜荆衡杖葉公之權有包
胥之志而令白公伍員得極其暴竊爲邱明恥
之區區楚國子重之徒猶恥君弱臣強臣不及
先大夫厲己戒衆以服陳鄭越之種蠡尙能弼
佐勾踐取威黃池况今吳士英賢比肩而不聞
輔翼聖主陵江北伐以義聲之直討逆暴之徒
檄命舊都之士招懷存本之人豈不因風振落
頓坂走輪哉且孫氏之初以長沙之衆摧破董

卓志匡漢室雖中罹寇害雅志不遂原其誠心
乃忽身命及權據揚越外仗周張內憑顧陸拒
魏赤壁克取襄陽自茲以降世主相襲咸能侵
逼徐豫令魏朝旰食不知今之江表爲賢儁匿
志藏其勇畧耶將呂蒙凌統高蹤曠世哉况今
凶敵逆暴中州人士逼迫勢促顛沛之危甚於
累卵假號之彊衆心所去敵有釁矣易可震蕩
王郎袁術雖自詐僞皆基淺根微禍不旋踵此
皆君侯之所見聞者矣王司徒清虛寡欲善於

全已昔曹參亦崇此道著畫一之稱也庾公居
元舅之尊處申伯之任超然高蹈明智之權虜
於寇難之際受大晉累世之恩自恨絕域無益
聖朝徒係心萬里望風懷憤今海內之望足爲
楚漢輕重者惟在君侯若戮力盡心悉五州之
衆據兗豫之郊使向義之士倒戈釋甲則外患
必除國恥必雪虜在一方敢不竭命孤軍輕進
不足使勒畏首畏尾則懷舊之士內應無由自
發故也故遠陳寫言不盡宣

君以椒房之親舅氏之昵總據樞機出內王命
兼擁列將州司之位昆弟網羅顯布畿甸自秦
漢以來隆赫之極豈有若此者乎以吾觀之若
功就事舉必享申伯之名如或不立不免梁竇
之迹矣每觀史傳未嘗不寵恣母族使執權亂
朝先有殊世之榮尋有負乘之累所謂愛之適
足以爲害吾嘗忿歷代之主不盡防萌終寵之
術何不業以一土之封令藩國相承如周之齊

陳如此則永保南面之尊復何黜辱之有乎竇
武何進虛已好善賢士歸心雖爲闡豎所危天
下嗟痛猶有能履以不驕圖國忘身故也方今
四海有倒懸之急中夏逋僭逆之寇家有漉血
之怨人有復讐之憾寧得安枕逍遙雅談卒歲
耶吾雖寡德過蒙先帝列將之授以數郡之人
尙欲并吞強敵是以自頃及今交鋒授刃一時
務農三時用武而猶師徒不頓倉有餘粟敵人
日畏我境日廣况乃王者之威堂堂之勢豈可

同年而語哉

上陶侃書

晉 韓 矯

自古有國有家鮮不極盛而衰自大晉龍興克
平嚄會神武之畧邁蹤前史惠皇之末后黨構
難禍結京畿釁成公族遂使逆寇乘虛傾覆諸
夏舊都淪滅山陵掘毀人神悲悼幽明發憤昔
獫狁之強匈奴之盛未有如今日強寇之暴跨
躡華裔盜稱尊號者也天祚有晉挺授英傑車
騎將軍慕容廆自弱冠莅國忠於王室明允恭

肅志在立勳屬海內分崩皇輿遷幸元皇中興
初倡大業肅祖繼統蕩平江外虜雖限以山海
隔以強寇翹首引領係心京師常假寤寐欲憂
國忘身貢篚相尋連舟載路馬

戎一作

不稅駕動

成義舉今寇亂滔天怙其醜類樹基趙魏跨略
燕齊虜雖率義衆誅討大逆然管仲相齊猶曰
寵不足以御下况虜輔翼王室有匡霸之功而
位卑爵輕九命未加非所以寵異藩翰敦獎殊
勳者也方今詔命隔絕王路嶮遠貢使往來動

彌年載今燕之舊壤北周沙漠東盡樂浪西暨

代土

山一作

南極冀方悉爲外庭非復國家之城

將佐等以爲宜遠尊周室近準漢初進封虜爲
燕王行大將軍事上以總統諸部下以割損賊
境使冀州之民望風向化虜得祇承詔命率合
諸國奉辭夷逆以成桓文之功苟利社稷專之
可也而虜固執謙光守節彌高每詔所加讓動
積年非將佐等所能敦逼今區區所陳不欲苟
相崇重而愚情至心實爲國計

報封抽韓矯等書

晉陶侃

車騎將軍憂國忘身貢篚載路寇賊求和執使
送之西討段國北伐塞外遠綏索頭荒服以獻
惟北部未賓屢遣征伐又知東方官號高下齊
班進無統攝之權退無等差之降欲進車騎爲
燕王一二具之夫功成進爵古之成制也車騎
雖未能爲官摧勒然忠義竭誠今騰牋上聽可
否遲速當任天臺也

與遼東撫巡諸公書

明陳綰

夫遼東之荒極矣敝關切近觸目劇心愧不能
上鄭俠之圖亦嘗抱鄰父之憂竊爲議之今之
所謂救荒者非請發內帑乎非悉發官廩乎非
勸借富民乎夫請發內帑大工鼎興司農告匱
年例外不能多發矣悉發官廩遼之廩庾所積
幾何勸借富民自霖雨壞蓋藏外國掠屯堡富
者轉爲貧矣今之所恃惟關西糴買一節耳然
薊永歲本不登加以沿邊糴買軍餉其資遼東
者所謂以升合之水救涸魚也近以薊永米少

遼人糴買者多則有商販轉市山東之粟自天津等處下船徑抵豐臺鎮遼人有力者從此轉搬無力者止赴山海攜數十百文覓升斗於商販之手夫米價已騰貴加以輾轉接買大若驢馱車輦小者背負手提盤桓中途計車脚之費浮於米值亦止可達廣寧以西耳遼東以東不惟隔三岔河而平陸溝渠車牛莫達其所仰給者惟金復等處及黃山一帶些須之產而關西之米踰河東者絕少夫轉輸不通糴買無從則

米價日增雖月散數金無益也說者以爲海禁少寬使天津直沽之船不抵豐臺鎮得抵三岔河不惟廣寧以西可濟而遼陽以東豈至陪斃如今日哉夫救荒如救焚溺海禁固不可弛然與活遼東千萬人旦夕之命孰重夫從權以濟一時之急而年豐禁復如故是從權以活千萬人之命而禁復在也夫遼鎮之隸山東者本以通海道也成化以前禁例未行文移往來花布鈔錠解送皆取海上捷徑故有無相通緩急相